

## Persepsi Mahasiswa Pengajian Malaysia Terhadap Pilihan Raya Umum ke-14

*The Perception of the Students of Malaysian Studies towards the 14<sup>th</sup> General Election*

**Marshelayanti Mohamad Razali<sup>1</sup>, Siti Nor Adila Ayob<sup>2</sup>**

<sup>1,2</sup>*Jabatan Kemasyarakatan dan Kewarganegaraan, Fakulti Sains Kemanusiaan, Universiti Pendidikan Sultan Idris, 39000 Tanjung Malim, Perak.  
Emel: marshela@fsk.upsi.edu.my*

### Abstrak

Artikel ini bertujuan untuk meneroka persepsi mahasiswa Pengajian Malaysia di Universiti Pendidikan Sultan Idris (UPSI) terhadap Pilihan Raya Umum ke-14. Secara khususnya, artikel ini bertujuan untuk menjawab soalan-soalan berikut: Apakah sumber maklumat politik mahasiswa pada Pilihan Raya Umum (PRU) ke-14? Bagaimanakah persepsi mahasiswa terhadap PRU ke-14? Bagi menjawab persoalan ini, pendekatan kuantitatif dilakukan dengan menggunakan kaedah survei. Seramai 112 mahasiswa yang mengikuti program Pengajian Malaysia di Fakulti Sains Kemanusiaan UPSI dipilih untuk menjawab borang soal selidik. Secara umumnya, kajian ini mendapati bahawa bagi sumber bercetak, akhbar harian perdana merupakan sumber utama manakala bagi sumber elektronik pula, laman sosial adalah sumber utama bagi pencarian maklumat politik. Secara keseluruhannya, mahasiswa UPSI menjangkakan Barisan Nasional (BN) akan menang pada PRU ke-14.

**Kata Kunci:** persepsi, mahasiswa, Pilihan Raya Umum ke-14, UPSI.

### Abstract

*This article aims to explore the perceptions of Malaysian Studies students at Universiti Pendidikan Sultan Idris (UPSI) towards the 14<sup>th</sup> General Election. In particular, this article aims to answer the following questions: What are the sources of student political information about the 14<sup>th</sup> General Elections? What is the perception of the students about the 14<sup>th</sup> General Election? To answer these questions, quantitative approach was conducted using survey methods. A total of 112 students from the Malaysian Studies program at the Faculty of Human Sciences UPSI were selected to answer the questionnaires. In general, this study found that for the printed source, the mainstream daily newspaper is a major source while for the electronic source, the social sites are a major source of political information. Overall, UPSI students expect the Barisan Nasional (BN) to win in the 14<sup>th</sup> general election.*

**Keywords:** perception, student, 14<sup>th</sup> General Election, UPSI.

### Pengenalan

Mahasiswa merupakan golongan yang sangat penting kepada negara. Mereka juga merupakan aset penting kepada institusi pengajian tinggi dalam sesebuah negara. Mahasiswa merujuk kepada segolongan individu pelajar yang sedang mengikuti satu proses pendidikan yang tersusun dan terancang seperti di universiti, institut, kolej, akademi ataupun politeknik (Mohd Fuad Mat Jali et al., 2012a). Ia juga merujuk kepada kumpulan pelajar yang berada di institusi pengajian tinggi dalam sistem pendidikan yang formal di sesebuah negara. Di Malaysia, kebiasaannya mahasiswa tergolong dalam lingkungan umur di antara 18 hingga 24 tahun, iaitu selepas mereka menamatkan pengajian di sekolah menengah, dengan peringkat Sijil Pelajaran Malaysia (SPM).

Persepsi pula merujuk kepada pandangan seseorang terhadap sesuatu yang akan membuat respons bagaimana dan dengan apa seseorang akan bertindak (Junaidi Awang Besar et al., 2014). Kotler (dalam Arindita, 2003) berpendapat bahawa persepsi adalah suatu proses pemberian erti atau makna terhadap

persekitaran. Ia merujuk kepada proses bagaimana seseorang memilih, mengatur dan menginterpretasikan input informasi untuk menghasilkan gambaran keseluruhan yang bermakna.

Malaysia merupakan sebuah negara yang mengamalkan sistem demokrasi berparlimen. Antara ciri-ciri sistem ini adalah pilihan raya. Melalui pilihan raya, rakyat berpeluang untuk memilih perwakilan dan menentukan siapa yang akan membentuk kerajaan (Malike Brahim, 2012). Sistem ini telah diamalkan di Malaysia semenjak negara ini mencapai kemerdekaan pada 31 Ogos 1957. Setiap empat atau lima tahun sekali, pilihan raya diadakan bagi memilih pemimpin dan kerajaan, seperti yang termaktub di dalam Perlembagaan Malaysia. Sehingga tahun 2017, Malaysia telah mengadakan 13 kali pilihan raya umum sejak ianya mula diperkenalkan. Ia diadakan apabila tempoh lima tahun berakhir, atau apabila Yang di-Pertuan Agong membubarkan Parlimen, atas nasihat Perdana Menteri.

Penglibatan mahasiswa dalam politik dikesan sejak dari zaman kolonial lagi. Pada ketika itu, agenda gerakan mahasiswa adalah menuntut perubahan untuk membentuk negara yang lebih baik. Setelah merdeka, gerakan mahasiswa lebih tertumpu kepada isu dalam kampus dan kebajikan pelajar. Namun, akibat daripada pengaruh politik nasional, khususnya semasa pilihan raya umum 1969, ia telah menyebabkan penglibatan mahasiswa di dalam politik menjadi lebih rancak. Rentetan daripada itu, Akta Universiti dan Kolej Universiti (AUKU) diwartakan pada tahun 1971. Secara umumnya, AUKU ditujukan khusus kepada institusi pendidikan tinggi untuk mengawal dan mentadbir institusi tersebut (Rohani Abd. Rahim et al., 1992). Akta ini mengandungi 5 bahagian dan 27 seksyen (Junaidi Abu Bakar, 1993), dan terdapat peruntukan yang menyekat kebebasan mahasiswa dalam politik. Sejak itu, penglibatan mahasiswa dalam politik tidak lagi bebas dan dikawal melalui akta tersebut. Namun, akta ini telah melalui beberapa pindaan sejak ianya mula diwartakan dan pindaan terakhir adalah pada tahun 2012.

Oleh yang demikian, kajian ini dijalankan bagi mengenalpasti persepsi mahasiswa Pengajian Malaysia terhadap PRU ke-14. Parlimen Malaysia dibubarkan pada 7 April 2018 bagi membolehkan PRU ke-14 diadakan. Menurut Perlembagaan Persekutuan, pilihan raya umum hendaklah dilakukan dalam tempoh 60 hari selepas Parlimen dibubarkan. 9 Mei 2018 telah ditetapkan sebagai hari pengundian bagi memilih wakil-wakil Dewan Rakyat. Secara khususnya, kajian ini akan mengenalpasti sumber maklumat politik mahasiswa dan meneliti persepsi mahasiswa terhadap PRU ke-14.

## **Kajian Persepsi Politik di Malaysia**

Kajian mengenai persepsi politik sering menerima perhatian penyelidik. Kajian mengenai persepsi politik ini dikaji dari pelbagai sudut dan perspektif. Di Malaysia, banyak kajian yang berkaitan dengan persepsi politik telah dijalankan. Seseengah sarjana mengkajinya secara umum dan ada yang mengkajinya mengikut negeri. Ada juga pengkaji yang melihat dari segmen tertentu seperti pada golongan belia dan pelajar.

Junaidi Awang Besar et al. (2012) dalam kajian mereka mengenai persepsi belia terhadap isu politik dan dasar kerajaan Malaysia mendapati bahawa belia menyatakan yang kerajaan kurang berkesan dalam menangani rasuah dan politik wang, justeru ia menyebabkan generasi muda kurang menyokong kerajaan. Kajian ini juga mendapati bahawa belia berpendapat prestasi kepimpinan di peringkat Nasional adalah baik. Mereka yakin terhadap kepimpinan Dato' Sri Mohd. Najib Tun Hj. Abdul Razak untuk membela nasib rakyat melalui pelan transformasi pembangunan negara dan terus memberikan perkhidmatan terbaik kepada rakyat.

Abdul Hadi Samsi et al. (2013) dalam kajian mereka di Selangor mendapati bahawa belia mempunyai persepsi sederhana terhadap kepimpinan Barisan Nasional (BN). Manakala persepsi belia terhadap kepimpinan Pakatan Rakyat (PR) pula menunjukkan belia mempunyai persepsi yang sederhana. Selain itu, kajian ini juga mengkaji penglibatan politik belia dan dapatan kajian menunjukkan 61.4 peratus daripada responden menyatakan bahawa mereka telah mendaftar sebagai pengundi. Kajian menunjukkan bahawa responden mempunyai tahap penyertaan politik yang rendah. Ini kerana responden lebih suka memberi tumpuan lebih kepada pendidikan dan pembinaan kerjaya, bukan untuk terlibat dalam politik.

Mohd Fuad Mat Jali et al. (2012b) mengkaji isu dan persepsi belia terhadap politik dalam PRU Dewan Undangan Negeri (DUN) Sarawak 2011. Melalui borang soal selidik yang diedarkan, dapatan kajian menunjukkan isu pembangunan dan ekonomi menjadi isu yang sering dibincangkan oleh rakyat dalam PRU DUN Sarawak 2011. Selain itu, kajian ini menunjukkan golongan muda menyokong aspirasi kerajaan dalam memantapkan agenda pembangunan belia negara. Mereka percaya dengan menyokong kerajaan, pembangunan belia akan terus dipertingkatkan dan persatuan belia akan terus aktif dan berkembang maju dengan pelbagai aktiviti dan program yang berfaedah kepada golongan muda.

Junaidi Awang Besar, et al. (2014) pula mengkaji persepsi politik dalam PRU 2013 di Kuala Lumpur. Berdasarkan soal selidik yang diedarkan, kajian ini mendapati bahawa faktor utama yang mendorong rakyat menyokong BN adalah atas dasar mengenang dan menghargai jasa pemimpin terdahulu. Mereka berpendapat adalah wajar untuk terus menyokong pentadbiran BN kerana pemimpin sebelum ini telah banyak menyumbang idea dan tenaga demi membangun dan memajukan negara. Sementara itu, faktor yang menyebabkan rakyat menyokong PR adalah kerana janji yang ditawarkan. Mereka menjanjikan beberapa tawaran kepada rakyat sekiranya diberi peluang untuk memerintah negara ini. Seterusnya, mengenai persepsi responden mengenai isu politik semasa, dapatan kajian menunjukkan bahawa majoriti responden bersetuju dengan pelaksanaan Bantuan Rakyat 1 Malaysia (BR1M), Kedai Rakyat 1 Malaysia (KR1M) dan Program Rumah Rakyat 1 Malaysia (PR1MA). Mereka berpendapat pelaksanaan program-program ini berjaya membantu meringankan beban kos hidup golongan berpendapatan rendah dan pertengahan.

Dalam kajian yang lain pula, Mohd Fuad Mat Jali, et al. (2012a) mengkaji persepsi politik belia India di Institusi Pengajian Tinggi Awam (IPTA). Penglibatan belia India dalam politik iaitu melalui *Malaysian Indian Congres* (MIC) mula membuka mata banyak pihak terutamanya apabila mereka menubuhkan *Hindu Rights Action Force* (HINDRAF) atau Barisan Bertindak Hak Asasi Hindu bagi mendapatkan hak-hak orang India. Berdasarkan kaji selidik dan pemerhatian, dapatan kajian menunjukkan kebanyakan belia India IPTA menyokong aspirasi kerajaan dalam memantapkan agenda pembangunan belia negara. Selain itu, responden juga mahukan pihak Kerajaan Pusat serius dalam menangani permasalahan masyarakat India di Malaysia seperti isu pendidikan di sekolah Tamil, pemberian biasiswa, isu kuota, isu agama dan isu sosioekonomi. Dari segi jangkaan parti, majoriti belia India IPTA menjangkakan BN akan memenangi PRU ke-13. Namun begitu, kajian ini hanya memberi penumpuan kepada belia India sahaja.

Kajian-kajian lepas berkaitan mahasiswa dan persepsi politik telah membantu untuk memberi kefahaman yang jelas mengenai topik ini. Namun, kajian yang menumpukan kepada PRU-14 masih kurang dilakukan oleh para sarjana, khususnya yang berkaitan dengan mahasiswa. Justeru, kajian ini dilakukan bagi mengisi kelonggangan mengenai persepsi politik mahasiswa terhadap PRU ke-14.

## Metodologi Kajian

Reka bentuk kajian dalam penyelidikan ini adalah tinjauan menggunakan borang soal selidik. Satu set borang soal selidik diedarkan kepada mahasiswa yang mengikuti program Ijazah Sarjana Muda Pengajian Malaysia dengan Pendidikan di Universiti Pendidikan Sultan Idris (UPSI). Bagi menjawab borang soal selidik ini, seramai 112 responden dipilih dengan menggunakan kaedah persampelan bertujuan. Borang soal selidik tersebut diedarkan dalam tempoh seminggu sebelum PRU ke-14 diadakan. Tempoh masa ini merupakan masa yang paling sesuai memandangkan ia adalah tempoh berkempen bagi parti politik yang bertanding. Datayang diperolehi kemudiannya dianalisis dengan menggunakan perisian SPSS 23.0, dari segi kekerapan dan peratusan, dan dipersembahkan dalam bentuk jadual.

Ijazah Sarjana Muda Pengajian Malaysia dengan Pendidikan merupakan satu-satunya program yang ditawarkan di Malaysia bagi melatih dan menyediakan bakal guru yang memiliki pengetahuan dan kemahiran yang secukupnya dalam bidang Pengajian Malaysia. Program ini diwujudkan bagi memenuhi keperluan tenaga pengajar di sekolah dan institusi pengajian tinggi, khususnya dalam bidang Pengajian Am dan Pengajian Malaysia. Selain menyediakan bakal guru, program ini juga diwujudkan bagi

melahirkan siswazah yang memiliki pengetahuan dalam pelbagai bidang. Ini kerana siswazah program Pengajian Malaysia dilengkapi dengan ilmu sosiologi, budaya, politik, undang-undang, dan pembangunan. Oleh kerana pelajar daripada program ini mempelajari bidang politik, persepsi mereka terhadap politik, khususnya mengenai PRU-14 adalah penting untuk dikaji.

Di UPSI, program Pengajian Malaysia ini diletakkan di bawah tanggungjawab Jabatan Pengajian Kemasyarakatan dan Kewarganegaraan (JPKK), Fakulti Sains Kemanusiaan (FSK). Selain JPKK, FSK juga terdiri dari Jabatan Geografi, Sejarah dan Pendidikan Islam. Sehingga tahun 2018, JPKK merupakan jabatan yang akhir ditubuhkan di dalam fakulti ini. Jabatan ini terdiri daripada dua program, iaitu Pengajian Malaysia dan Pendidikan Moral. Program Pengajian Malaysia telah memulakanambilan pelajar yang pertama pada sesi 2007/2008 (Nazirah Lee, Zanariah Noor, Mohd Faris Dziauddin, Muhamad Sayuti Hassan@Yahya, & Mazdi Marzuki, 2015).

## Hasil Kajian dan Perbincangan

Bahagian ini membincangkan mengenai hasil kajian dan perbincangan. Pertama, ia mengenal pasti latar belakang responden, dan seterusnya, bahagian ini mengenalpasti sumber maklumat politik mahasiswa dan persepsi mereka terhadap PRU-14.

## Demografi Responden

Daripada 112 responden yang menjawab borang soal selidik, peratusan tertinggi menunjukkan mereka terdiri daripada pelajar semester 4 (28.6%), diikuti oleh pelajar semester 3 (25%), semester 8 (21.4%), semester 6 (13.4%), dan semester 2 (11.6%) (rujuk Jadual 1). Antara faktor yang menyebabkan majoriti responden terdiri daripada pelajar semester 4 adalah mereka telah mempelajari subjek berkaitan politik sejak dari semester ke-3 lagi. Dan faktor ini juga yang menyebabkan responden terendah terdiri daripada pelajar semester 2. Ini kerana pelajar-pelajar ini masih belum mempelajari subjek berkaitan politik pada semester 1 dan 2.

Jadual 1: Demografi

	Demografi	Kekerapan (N=112)	Peratus (%)
Semester	2	13	11.6
	3	28	25
	4	32	28.6
	6	15	13.4
	8	24	21.4
Jantina	Lelaki	18	16.1
	Perempuan	94	83.9
Umur	21 tahun	14	12.5
	22 tahun	56	50
	23 tahun	16	14.3
	24 tahun	25	22.3
	25 tahun dan ke atas	1	0.9
Bangsa	Melayu	74	66.1
	Cina	5	4.5
	India	182	1.8
	Bumiputera Sabah	20	17.9
	Bumiputera Sarawak	11	9.8

Majoriti daripada responden merupakan pelajar perempuan (83.9%) dan 16.1% pelajar lelaki. Ini kerana majoriti pelajar Pengajian Malaysia terdiri daripada perempuan. Dari segi umur, peratusan tertinggi menunjukkan mereka berumur 22 tahun (50%), diikuti dengan 24 tahun (22.3%), 23 tahun

(14.3%), 21 tahun (12.5%), dan hanya 0.9% yang berumur lebih daripada 25 tahun. Dari segi bangsa pula, majoriti daripada responden berbangsa Melayu (66.1%), diikuti dengan Bumiputera Sabah (17.9%), Bumiputera Sarawak (9.8%), Cina (4.5%), dan India (1.8%). Ini kerana majoriti pelajar Pengajian Malaysia terdiri daripada bangsa Melayu berbanding lain-lain bangsa. Jadual 1 menunjukkan demografi responden secara terperinci.

## Sumber Maklumat Politik

Bagi kajian ini, sumber maklumat politik dibahagikan kepada dua jenis, iaitu sumber bercetak dan elektronik.

Merujuk kepada Jadual 2, bagi sumber bercetak, majoriti responden mendapat maklumat politik dari akhbar harian perdana (72.3%). Selain itu, responden juga mendapatkan maklumat berkaitan politik dari akhbar parti (11.6%), pamflet (10.7%), dan majalah tempatan (5.4%). Antara faktor yang menyebabkan akhbar harian perdana mendapat peratusan tertinggi bagi sumber bercetak maklumat politik adalah ia mudah diperolehi. Kajian terdahulu turut melaporkan bahawa akhbar merupakan sumber maklumat utama dalam mendapatkan maklumat (Wan Asna Wan Mohd Nor et al., 2011). Bagi pelajar UPSI, akhbar harian perdana lebih mudah diperolehi berbanding sumber bercetak yang lain.

Bagi sumber elektronik pula, laman sosial menunjukkan peratusan tertinggi iaitu 53.6%. Ini diikuti dengan blog politik (15.1%), televisyen (18.8%), aplikasi 'whatsapp' (8.9%), dan radio (3.6%) (lihat Jadual 2). Laman sosial bukan hanya berfungsi sebagai alat untuk tujuan bersosial, tetapi ianya juga berfungsi sebagai medium untuk mendapatkan berita berkaitan politik. *Facebook*, *Instagram* dan *Twitter* merupakan antara laman sosial yang kerap digunakan oleh rakyat Malaysia. Fenomena ini juga adalah sama dengan mahasiswa di UPSI. Secara umumnya, mahasiswa ini mempunyai akaun laman sosial. Mohamad Md Yusoff dan Thabit (2015) dalam kajian mereka mendapati penggunaan *Facebook* dalam kalangan belia di Malaysia adalah lebih tinggi berbanding laman sosial yang lain, bagi tujuan bersosial dan mendapatkan maklumat.

Jadual 2: Sumber Maklumat Politik

	Sumber	Frekuensi (N=112)	Peratus (%)
Sumber Bercetak	Akhbar Harian Perdana	81	72.3
	Akhbar Parti	13	11.6
	Pamflet/ <i>Flyers</i>	12	10.7
	Majalah Tempatan	6	5.4
Sumber Elektronik	Blog Politik	17	15.1
	Laman Sosial	60	53.6
	Televisyen	21	18.8
	Radio	4	3.6
	<i>Whatsapp</i>	10	8.9

## Persepsi Mahasiswa Terhadap Isu

Seterusnya, responden diminta untuk menyatakan pendapat mengenai beberapa isu di dalam negara. Bagi setiap pernyataan, responden perlu menyatakan pendapat mereka melalui skala yang disediakan. Isu-isu yang dibincangkan merangkumi pendidikan, ekonomi, politik dan sosial.

Bagi isu pendidikan, Jadual 3 menunjukkan majoriti responden bersetuju bahawa pemberian Kad Diskaun Siswa 1 Malaysia (KADS1M) memberi manfaat kepada mahasiswa (73.2%). Hanya 16.1% responden sahaja yang tidak bersetuju dan 10.7% responden yang tidak pasti dengan pernyataan ini. KADS1M merupakan inisiatif kerajaan bagi mengurangkan beban perbelanjaan akademik dalam kalangan pelajar pengajian tinggi. Pelajar yang layak akan menerima sejumlah RM250 yang dikreditkan

ke dalam akaun, bermula pada sesi pengajian tahun 2017. Namun, beberapa tahun sebelum itu, pelajar turut menerima bantuan kerajaan ini tetapi bantuan tersebut diberikan dalam bentuk baucer buku. Majoriti responden bersetuju dengan pernyataan ini kerana pengajian di universiti memerlukan kos yang tinggi seperti membeli buku dan mencetak tugas. Dengan adanya bantuan seperti ini, ia dapat mengurangkan beban mahasiswa terutamanya yang datang dari keluarga sederhana dan susah.

Bagi isu ekonomi pula, majoriti responden bersetuju bahawa Cukai Barangan dan Perkhidmatan (GST) yang dikenakan kepada rakyat turut membebankan pelajar (84.8%). Hanya 11.6% responden sahaja yang tidak bersetuju dan 3.6% responden yang tidak pasti dengan pernyataan ini (lihat Jadual 3). GST mula berkuatkuasadi negara ini pada 1 April 2015. Semenjak penguatkuasaan tersebut, banyak pihak kurang bersetuju dengan pelaksanaannya. Antara faktor yang menyebabkan majoriti responden mengatakan ianya membebankan adalah kerana mereka merupakan golongan yang masih belajar dan tidak mempunyai pendapatan. Kebanyakan pelajar menyambung pengajian di universiti dengan bantuan sepertibiasiswa atau pinjaman badan tertentu. Situasi sama juga berlaku kepada mahasiswa di UPSI. Kebanyakan daripada mahasiswa ini membuat pinjaman pendidikan bagi membiayai pengajian mereka. Antara badan yang memberikan pinjaman pengajian tinggiialah Perbadanan Tabung Pendidikan Tinggi Nasional (PTPTN).

Seterusnya, mengenai isu politik, majoriti responden bersetuju bahawakerajaan persekutuan kurang berjaya untuk menangani rasuah dan politik wang (65.2%). 25.9% responden menyatakan tidak setuju dan hanya 8.9% responden menyatakan tidak pasti dengan pernyataan ini. Ini selari dengan dapatan kajian yang dilakukan oleh Junaidi Awang Besar et al. (2012). Kajian mereka mendapati belia menyatakan yang kerajaan kurang berkesan dalam menangani rasuah dan politik wang. Ini menyebabkan generasi muda khususnya belia kurang menyokong kerajaan.

Manakala bagi pernyataan bahawa kerajaan persekutuan kurang berjaya mewujudkan peluang pekerjaan kepada rakyat, Jadual 3 menunjukkan majoriti responden juga menyatakan setuju (67.9%), manakala 26.9% menyatakan tidak bersetuju dan 6.2% menyatakan tidak pasti. Antara isu yang kerap dibangkitkan oleh lepasan graduan adalah peluang pekerjaan. Peluang pekerjaan yang ditawarkan adalah tidak seimbang dengan graduan yang dilahirkan saban tahun, dan ini menyebabkan peningkatan bilangan graduan menganggur. Statistik yang dikeluarkan oleh Jabatan Perangkaan Malaysia (2018) menunjukkan kadar pengangguran di dalam negara sekitar 3% iaitu lebih kurang 500, 000 orang.

Jadual 3. Persepsi Politik Responden

Isu	Setuju		Tidak setuju		Tidak Pasti	
	Kekerapan (n=112)	%	Kekerapan (n=112)	%	Kekerapan (n=112)	%
KADSIM memberi manfaat kepada mahasiswa	82	73.2	18	16.1	12	10.7
GST membebankan pelajar	95	84.8	13	11.6	4	3.6
Kerajaan Persekutuan kurang berjaya untuk menangani rasuah dan politik wang	73	65.2	29	25.9	10	8.9
Kerajaan Persekutuan kurang berjaya mewujudkan peluang pekerjaan kepada rakyat	76	67.9	29	26.9	7	6.2

### Jangkaan Parti Yang Akan Menang Pada PRU ke-14

Kajian ini seterusnya bertanyakan pendapat responden mengenai parti yang akan menang pada PRU ke-14. Majoriti responden menjangkakan parti BN akan menang keseluruhan pada PRU ke-14 (40.2%). Ini diikuti dengan Pakatan Harapan (PH) (38.4%) dan lain-lain (13.4%). Hanya 8% responden sahaja yang menjangkakan Parti Islam Se-Malaysia (PAS) menang dalam pilihan raya kali ini. Jadual 4 menunjukkan secara terperinci mengenai jangkaan parti yang akan menang pada PRU ke-14.

Jadual 4. Jangkaan Parti yang Menang

Parti Politik	Kekerapan (n=112)	%
BN	45	40.2
PH	43	38.4
PAS	9	8
Lain-lain	15	13.4

Responden berpendapat bahawa BN menang secara keseluruhan kerana parti ini telah lama memerintah negara dan mereka tahu bagaimana untuk memimpin negara dengan corak pemerintahan yang baik dan konsisten. Selain itu, sokongan yang kuat juga mungkin penentu bahawa parti ini akan meneruskan pemerintahan negara kerana kedudukan parti yang stabil dan sokongan yang padu daripada rakyat. Meskipun ramai yang berpendapat demikian, ada juga responden yang menjangkakan BN akan menang tipis. Mereka berpendapat PH mampu mengubah corak kepimpinan negara kerana mempunyai ramai pemimpin yang berkualiti. Ini dibuktikan dengan kejayaan parti pembangkang menawan beberapa negeri pada PRU yang lalu. Mereka juga mahukan pembaharuan dalam kepimpinan negara dan memberikan peluang kepada PH kerana manifesto yang dinyatakan kelihatan berkesan dan mempunyai potensi untuk ditunaikan.

## Kesimpulan

Hasil kajian menunjukkan bahawa secara umumnya, mahasiswamendapatkan maklumat politik melalui sumber bercetak dan elektronik. Bagi sumber bercetak, akhbar harian perdana merekodkan peratusan tertinggi berbanding sumber yang lain. Manakala bagi sumber elektronik, laman sosial merupakan sumber yang kerap digunakan oleh mahasiswa dalam pencarian maklumat berkaitan politik. Mengenai isu-isu di dalam negara, majoriti mahasiswa bersetuju dengan pernyataan yang diberikan. Manakala jangkaan parti yang akan menang pada PRU ke-14, mahasiswa menjangkakan BN akan mengekalkan prestasi mereka pada pilihan raya kali ini. Kajian yang lebih terperinci perlu dilakukan khususnya mengenai mahasiswa meliputi pusat-pusat pengajian tinggi yang ada di dalam negara. Dengan adanya kajian yang lebih terperinci, dengan penggunaan kepelbagaian kaedah dan metod, ianya akan dapat melihat gambaran keseluruhan mengenai mahasiswa di dalam negara. Kajian seumpama ini penting kerana mahasiswa merupakan bakal pemimpin negara pada masa hadapan.

## Rujukan

- Abdul Hadi Samsi, Amaludin Ab. Rahman & Ku Hasnita Ku Samsu. (2013). Persepsi belia terhadap parti politik dan tahap penglibatan politik di Selangor. *Malaysia Journal of Youth Studies*, 9, 107-120.
- Arindita, S. (2003). Hubungan antara persepsi kualitas pelayanan dan citra bank dengan loyalitas Nasabah. Surakarta: Fakultas Psikologi UMS.
- Jabatan Perangkaan Malaysia. (2018). *Statistik Utama Tenaga Buruh di Malaysia*. [https://www.dosm.gov.my/pdfPrev\[Akses pada 31 Mei 2018\]](https://www.dosm.gov.my/pdfPrev[Akses pada 31 Mei 2018]).
- Jayum A Jawan. (2003). *Politics and government in Malaysia*. Shah Alam: Karisma Publications Sdn. Bhd.
- Junaidi Abu Bakar. (1993). *Mahasiswa, politik dan undang-undang*. Kuala Lumpur: Dewan Bahasa dan Pustaka.
- Junaidi Awang Besar, Mohd Fuad Mat Jali, Yahaya Ibrahim, Khaidzir Ismail, Abdul Halim Sidek, & Noor Aziah Mohd Awal. (2012). Persepsi belia terhadap isu politik dan dasar kerajaan Malaysia. *Malaysian Journal of Youth Studies*, 7, 136-156.
- Junaidi Awang Besar, Rosmadi Fauzi, Amer Saifude Ghazali & Muhammad Hazim Abdul Ghani. (2014). Persepsi politik dalam Pilihan Raya Umum 2013: Kajian kes di Wilayah Persekutuan Kuala Lumpur. *Journal of Social Sciences and Humanities*, 9(2), 135-161.
- Malike Brahim. (2012). *Sistem demokrasi berparlimen di Malaysia*. Petaling Jaya: IBS Buku Sdn. Bhd.

- Marshelayanti Mohamad Razali & Wan Asna Wan Mohd Nor. (2017). Masyarakat dan Politik di Malaysia: Satu Tinjauan Ringkas. Dalam Norazlan Hadi Yaacob, Marshelayanti Mohamad Razali, Siti Noranizahahfizah Boyman, & Muhammad Sayuti Hassan (pnyt.), *Dinamisme masyarakat Malaysia: Esei sumbangsiah untuk Prof. Dr. Kanthasamy A/L Nallusamy* (pp. 161-170). Tanjung Malim: Penerbit Universiti Sultan Idris.
- Mohamad Md Yusoff, & Thabit, O. M. (2015). Social media and Malaysian youth's participation on facebook: An exploratory case. Dalam Aida Mokhtar (pnyt.), *Youths, Media and Politics: A New Identity* (pp. 109–131). Kangar: Penerbit Universiti Malaysia Perlis.
- Mohd Fuad Mat Jali, Junaidi Awang Besar, Novel Lyndon, & Viknesh Ramachandran. (2012a). Persepsi politik belia India di Institusi Pengajian Tinggi Awam (IPTA) Malaysia. *Malaysian Journal of Society and Space*, 8(8), 1–11.
- Mohd Fuad Mat Jali, Junaidi Awang Besar, Yahaya Ibrahim, Khaidzir Hj. Ismail, Novel Lyndon, Noor Aziah Hj. Mohd Awal, Jeniri Amir & Ahi Sarok. (2012b). Isu semasa dan persepsi belia terhadap politik dalam pilihan raya umum Dewan Undangan Negeri Sarawak 2011. *Malaysian Journal of Society and Space*, 8(8), 138-148.
- Moten, A. R., & Islam, S. S. (2009). *Introduction to political science* (4th Ed.). Singapore: Cengage Learning.
- Nazirah Lee, Zanariah Noor, Mohd Faris Dziauddin, Muhamad Sayuti Hassan@Yahya, & Mazdi Marzuki. (2015). Sedekad dalam Perkembangan : Fakulti Sains Kemanusiaan , 2005-2015. *Perspektif*, 7(2), 1–14.
- Rohani Abd. Rahim, Anisah Che Ngah, Kamal Halili Hassan, Aishah Bidin, & Raja Rohana Raja Mamat. (1992). *Hak dan tanggungjawab Akta Universiti dan Kolej Universiti*. Bangi: Penerbit Universiti Kebangsaan Malaysia.
- Tunku Mohar Mokhtar. (2008). Elections and electoral system. Dalam A.R. Moten (pnyt.), *Government and Politics in Malaysia*. Singapore: Cengage Learning.
- Tunku Mohar Mokhtar. (2008). Political parties and party system. Dalam A.R. Moten (pnyt.), *Government and Politics in Malaysia*. Singapore: Cengage Learning.
- Wan Asna Wan Mohd Nor, Salfarina Abdul Gapor, Mohamad Zaini Abu Bakar, & Zainon Harun. (2011). Patterns of internet and traditional media use for political information and political participation in Malaysia. *International Journal of Cyber Society and Education*, 4(1), 31–38.
- Zainah Anwar. (1987). *Islamic Revivalism in Malaysia: Dakwah among students*. Petaling Jaya: Pelanduk Publications.